



Gabinete Wever - Croes II



# ISLAONLINE

Noticia di Gobierno

2023

Diamars 12 September 2023

Email: [IslaOnline@gobierno.aw](mailto:IslaOnline@gobierno.aw) Tel: 528-4952

**2023**  
**AÑA DI**



**UNION**  
**Y POSITIVISMO!**



@IslaOnline2023





Evelyn Wever-Croes  
PROME MINISTER

# AÑA PARLAMENTARIO 2023-2024 LO TA SUMAMENTE FRUCTIFERO Y POSITIVO PA ARUBA

**"Hunto, Gobierno di Aruba, Parlamento di Aruba y pueblo di Aruba, ta logra trece progreso y bienestar pa henter nos comunidad"**



Diamars mainta, 12 di September, a tuma luga e apertura di Aña Parlamentario 2023-2024. Na Parlamento, a tuma luga e ceremonia na unda S.E. Gobernador di Aruba, Alfonso Boekhoudt a declara e aña Parlamentario habri. Esaki ta e di 38 Aña Parlamentario di Pais Aruba y e ta un momento hopi solemne pa e organo di mas importante di Pais Aruba.

Prome Minister Evelyn Wever-Croes e expresa cu S.E. Gobernador a duna un discurso balansa na unda cu S.E. Gobernador a refleha riba tur loke ta biba den nos comunidad. S.E. Gobernador a enfatisa cu apesar cu Aruba ta den recuperacion, keto bay Aruba tin retonan y ta solamente trahando hunto y cu e meta central di hiba nos pais dilanti, nos lo crea un futuro miho y mas sostenibel.

"Aruba ta den recuperacion, pero nos no ta ainda unda nos mester ta. Nos kier pa tur hende sinti e progreso y bienestar cu Gobierno di Aruba kier trece pa Aruba. Esaki S.E. Gobernador a elabora hopi balansa riba cada area di maneho den gobernacion", Prome Minister a expresa,

Prome Minister a remarca cu ta premira un aña Parlamentario nobo sumamente fructifero y positivo pa Aruba. Un aña na unda cu tin desicionnan importante cu mester tuma riba tereno financiero y negosacion cu Hulanda. Tin hopi ley den proceso pa wordo trata den Parlamento sperando e sosten di Parlamento. Pero esaki ta tambe e aña na unda cu proyectonan mester wordo concretisa y den esaki Parlamento ta parti hopi importante.

*"Mi ta desea tur parlamentario hopi exito y sabiduria y tambe hopi pasenshi den e aña Parlamentario aki. Manera Presidente di Parlamento, Edgard Vrolijk tambe a menciona, ta den sala di Parlamento e desicionnan grandi pa nos pais ta wordo tuma. Mas uni nos ta, mas nos ta logra pa nos pais. Den nomber di Gobierno di Aruba, mi ta desea tur Parlamentario un bon y fructifero Aña Parlamentario 2023-2024. Hunto, Gobierno di Aruba, Parlamento di Aruba y pueblo di Aruba, ta logra trece progreso y bienestar pa henter nos comunidad", Prome Minister Evelyn Wever-Croes a expresa.*





POTRETNAN DI APERTURA  
DI AÑA PARLAMENTARIO







# DEPARTAMENTO DI IMPUESTO A CUMINSA PAGA RESTITUCION DI INKOMSTENBELASTING DI AÑA 2022

**E atraso di 40 aña porfin ta keda pa pasado**



Na mei 2023 Departamento di Impuesto DIMP a informa comunidad cu e atraso den procesamiento di cobranza di inkomstenbelasting y primanan social manera AOV/AWW y AZV a pasa pa historia. Cu trabou duro y dedicacion grandi a logra elimina e retraso aki cu a existi pa 40 aña na nos Pais. DIMP a sigui di biaha cu e trabounan pa procesa e declaracion di inkomstenbelasting 2022 den nan sistema y awor por raporta cu den e prome mita di aña 2023 ya caba DIMP a paga un total di 15.4 miyon florin na restitucion na 8286 persona cu mester haya placa bek di aña 2019, 2020 y 2021.

## **A cuminsa paga restitucion di aña 2022**

E avanse grandi aki a trece cune cu tur persona cu ya caba a yena nan inkomstenbelasting di aña 2022 y cu no tin otro debe di belasting habri, ya caba ta hayando nan cobranza definitivo y por spera nan restitucion den e lunanan nos dilanti. Cu otro palabra, DIMP ya caba a cuminsa paga restitucion di inkomstenbelasting di aña 2022.

## **Critica baho di Parlamentario Tromp di MAS**

Pa largo tempo DIMP a ricibi hopi critica pa e atraso aki, pero a sa di sigui cu nan trabou na un manera profesional pa por logra e metanan stipula. Recientemente hasta Parlamentario Marisol Tromp di MAS a haya ta bon pa a lansa un critica masha baho den direccion di DIMP bisando cu 'ta primi bala di tur hende pa entrega cos na tempo, anto di bo mes ta añanan atrasa y no ta duna Pueblo su placa bek.' Minister Maduro ta lamenta cu Parlamentario Tromp pa falta di conocimiento, interes of simplemente wega di politikeria, ta scoge pa bagatalisa e esfuerzo grandi cu e team dedica di DIMP a haci cu ta dunando su fruto na bienestar di Aruba. Ta di spera cu ora Parlamentario Tromp yena su aangifte di aña 2022 y haya su restitucion cu prioridad como Parlamentario di Pais Aruba, cu elo sa di aprecia y elogia e trabou haci pa e profesionalnan di DIMP.

## **Masha danki na e team di DIMP**

Minister Maduro di Finansa ta gradici ful e team di DIMP bou liderazgo di Directora Luenne Gomez-Pieters y specialmente esnan cu a traha di cerca pa resolve e atraso grandi aki, pa e trabou grandi haci na bienestar di Aruba. DIMP tin mas reto su dilanti, pero como mandatario nos ta convenci cu hunto nos lo sa di surpasa e retonan ey tambe. Masha danki pa kere den Aruba!



# MINISTER MADURO A PRESENTA PA PROME BIAHA UN 'NOTA DI PRESUPUESTO 2024' HUNTO CU PRESUPUESTO 2024 NA PARLAMENTO PA BRINDA MAS TRANSPARENCIA FINANCIERO



Riba dia 1 di september Minister Maduro a entrega e concepto di Ley di Presupuesto 2024 na Parlamento. Hunto cu e presupuesto a entrega tambe un Nota di Presupuesto 2024 cu e meta pa brinda mas transparencia financiero.

E Nota di Presupuesto ta duna un bista general di e Presupuesto 2024 manera presenta na Parlamento di Aruba dia 1 di september 2023. E intencion ta pa duna informacion na comunidad di Aruba riba e pasonan cu ta ser tuma pa Gobierno pa yega na un finansa publico sostenibel riba termino largo.

Den e Nota di Presupuesto por mira e cifranan cardinal di Presupuesto 2024, ta duna un bista di e perspectiva di economia


y di inflacion, ta splica tambe riba e normanan financiero pa saldo financiero, gastonan di personal y nivel di debe. Banda di esaki ta duna un bista riba desaroyo di entrada y gasto compara cu e aña anterior y ta duna bista di e ehecucion di e Landspakket.

E informacion den e Nota di Presupuesto ta yuda pa Parlamento y Pueblo en general por hiba un debate riba finansa publico di nos Pais basa riba e cifranan real. E Nota di Presupuesto 2024 por wordo mira riba [www.gobierno.aw](http://www.gobierno.aw).



## NOTA DI PRESUPUESTO 2024

*Trahando pa un miho futuro pa Aruba*







## AAA NV A ORGANISA AIRPORT DAY ARUBA 2023 PA REGION DI LATINO AMERICA Y CARIBE



Minister di Turisno y Salud Publico sr. Dangui Oduber ta orguyoso di mira Aruba Airport Authority (AAA) organisa e prome “Airports Council International of the Latin America & Caribbean region (ACI-LAC) Airport Day Aruba 2023” den nomber di e dicho organisacion. Esaki sigur ta un honor hopi grandi pa pais Aruba y AAA.

Airport Council International ta e unico asociacion profesional mundial pa e operadornan di aeropuerto.

Minister Oduber a indica cu den e evento aki a participa 270 operador di aeropuerto di 34 pais di Latino America y Caribe. E evento aki ta hopi importante den cuadro di mehoracion di e servicionan cu ta duna na e turistanan den Latino America y Caribe.

Segun e madatario e turistanan mas y mas tin mas demanda, por ehempel nan kier mihor servicio, nan kier pa aeropuertonan ta mas eficiente y rapido. Esaki ta e retonan cu e aeropuertonan

ta confronta nan mes cune. Ta bay trata temanan di con pa stimula innovacion, tecnologia, sostenibilidad di aeropuertonan y tambe e perspectiva cu aeropuertonan tin pa futuro.

Durante e evento e grupo di aeropuertonan tin interes comun pa yega na e meta principal. Pa cuminsa cu combersacion cu stakeholders, socionan di aeropuerto, entidadnan den aviacion, gobierno y entidadnan di turismo enfocando riba e necesidadnan di e futuro biaheronan y con cada entidad lo adapta y mehora su servicionan pa atende miho cu e demandanan y e expectativanan.

Minister Oduber sigur ta hopi contento cu Aruba por a tabata e organisador di e evento aki, un evento di renombre mundial. E informacion cu a keda comparti sigur lo yuda Aruba su aeropuerto tambe pa mehora aun mas. Finalmente e mandatario kier a gradici AAA y tur e esnan cu a haci e evento aki un exito.



# Informacion di Participante

Number y Fam: \_\_\_\_\_  
Fecha di Nacemento: \_\_\_\_\_ Edad: \_\_\_\_\_  
Scol: \_\_\_\_\_ Klas: \_\_\_\_\_  
Number di Telefon di Mayor: \_\_\_\_\_



Un number faborito pa bo cacho: \_\_\_\_\_

## CONCURSO di Pintamento 2023

### Bo Kier Participa?

1. Participacion ta gratis! Tur muchanan di scol basico por participa (1e - 6e klas)
2. Si bo no a ricibi e formulario na scol, bo por download e formulario via: [specialprojectsaruba.org](https://specialprojectsaruba.org)
3. Tarea 1: Duna bo cacho un number  
Tarea 2: Pinta un (of mas) cacho den cura
4. Bo pintura mester ta uno original y creativo, e pintura mester ilustra un cacho den cura y bo por incorpora mas di e puntonan di e Ley di Cacho den dje
5. E pintura mester ta den color y mester ta pinta door di e mucha mes
6. Un (l) pintura pa cada participante; entrega bo formulario no mas tarda cu dia 22 di september 2023 na Bestuurskantoor Oranjestad, na HBK San Nicolas, of na e MFA mas cerca dibo
7. E ganadornan di cada klas lo wordo anuncia dia 4 di oktober 2023 Dierendag riba e pagina facebook di Gabinete Wever-Croes
8. Lo tin un regalito pa tur e ganadornan cu lo wordo entrega fin di oktober



Area pa pinta ↓

Area pa pinta ↓





# LO FORMA UN COMISION PA TRAHA RIBA UN STRUCTURA DI SALARIO MODERNO PA E DOCENTENAN

Minister di Enseñansa a splica cu ta trahando duro riba diferente aspecto den enseñansa pa mehora esaki. E vision di Enseñansa den Transicion 2021-2025 ta basa riba SDG 4, Doorlichtingsrapport y PEN 2023. Pa cu esaki tin hopi trabou continuo y paralelo ta tumando luga.

## **GARANTISA CONDICION BASICO PA UN ENSEÑANSA BON Y DI CALIDAD:**

Un aspecto importante den enseñansa ta pa percura y garantiza e condicionnan basico pa un bon enseñansa y di calidad, den combinacion cu un clima di seguridad adecua.

Pa logra esaki mester tin condicion minimo na nan luga, manera edificio adecua y den bon estado, lesmateriaal actualisa, suficiente personal cualifica y cuido (zorg) necesario pa e alumnonan. Pues, e condicionnan basico aki mester ta bon regla pa por garantiza un bon calidad di enseñansa. Sin e condicionnan basico aki, e “kernfunctie” di enseñansa manera “kwalificatie-allocatie” y “socialisatie” lo wordo afecta. E apoyo na e puntonan mas ariba describi ta necesario y mester ta den un forma structural pa garantiza e exito di nos structura di enseñansa. “Nos ta trahando duro riba esaki”, Minister Endy Croes a indica.

## **“ONDERWIJS ONDERSTEUNEND PERSONEEL”:**

E sosten y apoyo na e docentenan den enseñansa ta di vital importancia pa nos por cosecha exito y saca lo maximo di cada alumno. Pa e docentenan por efectua nan trabou cu e maximo capacidad, concentra totalmente na duna les y yuda e alumnonan cu tin mester di un ekipo na e scolnan. Asina sostiene e docentenan den e trabou bunita aki di educa nos yiunan. E ekipo di sosten ta di, entre otro, “Interne Begeleiders”, “Remedial Teachers”, “Schoolmaatschappelijke Werkers”, “Orthopedagogen” y “Psychologen”. Pues no sin mas, nos por cera wowo pa esakinan cu ta un necesidad. Sin e team aki e problemanan social y emocional di e alumnonan no ta haya e atencion debido. Un team asina lo brinda e alumnonan cu diferente tipo di problema e cuido corecto y necesario. Esaki lo



brinda e alumnonan cu dicho problemanan un miho oportunidad y un miho perspectiva pa un “passend vervolgonderwijs”. Esaki ta e manera ideal pa traha. Actualmente, e docentenan ta purba haci tur cos riba nan mes, cual ta conduci den posibel “burn-out” of e ratio di meldziek ta aumenta. Banda di esaki, awendia tanto “concierge” y IT no por wordo evita. Pues, lo traha duro den e proximo lunanan pa por determina cual ta e mix ideal pa brinda sosten. E siguiente tarea lo bira con pa financia esaki pa duna contenido real na e enseñansa den su totalidad. Minister Endy Croes a enfatisa cu pa esey nos lo bay ta creativo.

## **STRUCTURA DI SALARIO DI E DOCENTENAN:**

Durante aña 2012-2013, a traha riba un “functiehuis” nobo y un structura di salario nobo pa e “onderwijssector”. Nunca esaki a wordo implementa y awo esaki tambe ta 10 aña bieu y no ta di e tempo aki mas. E sistema actual ta basa riba edad, tipo di enseñansa y autoridad unda manera un docente alcanza 38 aña el a yega su plafond y no por crece mas. Minister Endy Croes lo implementa e aña aki un comision di experto pa traha riba un modelo y structura moderno di salario pa e docentenan.



# MINISTER ENDY CROES TA DESEA TUR STUDIANTE Y DOCENTE DI UNIVERSIDAD DI ARUBA UN AÑA ACADEMICO EXITOSO

**E aña aki Universidad di Aruba ta celebrando 35 aña di existencia**



Diabierna mainta, Minister di Enseñansa y Deporte Endy Croes hunto cu Su Excelencia Gobernador di Aruba Alfonso Boekhoudt, Prome Minister Evelyn Wever-Croes, colega Minister Ursell Arends, colega Minister Rocco Tjon, Presidente di Parlamento mr. Edgard Vrolijk y Parlamentario Ricky Hoek tabata presente na e apertura di aña academico 2023 - 2024 di Universidad di Aruba. Ademá di esaki, Universidad di Aruba ta celebrando su di 35 aniversario.

Tambe presente na e ocasion aki tabata rector di Universidad di Curaçao, Universidad di Sint-Maarten y demas invitadonan. Rector Viola Heutger ta gradici Gobierno di Aruba pa aporta den enseñansa di Aruba. A funda Universidad di Aruba na aña 1988 y desde e tempo ey, a sigui crece cu mas facultad y mas programa. Awendia, Universidad di Aruba ta conta cu 1565 graduado. E mandatario di Enseñansa ta felicita e rector Viola Heutger, College van Curatoren y henter e staf di Universidad di Aruba cu a cumpli 35 aña di existencia y ta desea tur estudiante y docente un aña academico exitoso.





## Departamento di Impuesto:

# POR CUMINSA PAGA IMPUESTO DI VEHICULO DI MOTOR DI AÑA 2024 ENTRANTE 8 DI SEPTEMBER

## E servicio di pago parcial tambe ta posibel

Departamento di Impuesto ta anuncia cu na e momentonan aki tur contribuyente automobilista por cuminsa haci pago di impuesto di vehiculo di motor di aña 2024. Di e forma aki Departamento di Impuesto ta permiti e contribuyentenan pa haci e pago mas trempan, dunando asina mas espacio financiero pa por cumpli cu nan deber fiscal. Manera ta conoci, e automobilista por scoge pa paga su impuesto di vehiculo di motor den un solo biaha of den mas biaha haciendo uzo di e servicio di pago parcial.

### Servicio di pago parcial

Pa por facilita e contribuyentenan mas tanto posibel, Departamento di Impuesto ta brinda servicio di pago parcial mescos cu durante e añanan anterior. Cu e servicio aki e contribuyentenan por paga e impuesto di vehiculo di motor adelanta y den pida pida. Na e momentonan aki e contribuyentenan lo tin 5 luna di tempo prome cu e fecha final di 31 di januari 2024 yega. Haciendo uzo di e servicio di pago parcial, e contribuyente por parti e peso financiero durante e lunanan venidero. Esaki ta beneficioso pa por ehempel e contribuyentenan cu ta den dificultad financiero of cu tin mas cu un auto. Pa e empresanan cu tin hopi auto, esaki ta un bon oportunidad tambe pa haci uzo di e servicio di pago parcial.

### E condicionnan di servicio di pago parcial

E condicionnan pa e servicio di pago parcial ta lo siguiente:

- Ta paga e impuesto delanta, esta prome cu dia 31 di januari 2024.
  - Ta haci e pago pa luna.
  - Ta paga e suma minimo rekeri sea Afl. 50 of Afl. 200 (depende e categoria di plachi).
  - No por paga menos cu Afl. 50 a menos cu e debe (restante) ta menos.
  - Ta haci e ultimo pago no mas laat cu dia 31 di januari 2024.
- E servicio di pago parcial ta valido unicamente pa pago di impuesto di vehiculo di motor.

Pago minimo ta depende e categoria di plachi

E pago minimo pa luna ta depende den cua categoria di plachi e vehiculo ta registra. Aki ta sigui un skema.

### Online Banking

Alabes Departamento di Impuesto ta recomenda su contribuyentenan pa paga via e sistema di Online Banking di Aruba Bank, Banco di Caribe of CMB, uzando e metodo di "Bill Payment".

Pa e pagonan online por wordo procesa debidamente, ta importante pa inclui e siguiente informacion:

- Persoonsnummer na cual e vehiculo ta registra

- Number di auto

- E periodo di cuenta cu ta pagando (por ehempel: jan-jun 2024)

Pa esnan cu ta haci uzo di e servicio di pago parcial y ta haci pago via banco: por pidi e recibo online despues di completa tur e pagonan di e impuesto. Por pidi e recibo via [www.impuesto.aw](http://www.impuesto.aw) – Digitale formulieren y scoge 'Kwitantie motorrijtuigbelasting aanvragen(externe link)'.

Por acudi tambe na e oficina principal na Camacuri, e MFA-nan of edificio di Post Aruba na San Nicolas pa haci pago.

### E fecha final ta 31 di januari 2024

Dia 31 di januari 2024 ta ultimo dia cu por paga e impuesto di e prome mita di aña 2024. Pa e vehiculonan cu ta cay den e categorianan MFA, MFV y Plachi di nomber, mester paga e impuesto di aña 2024 completo pa dia 31 di januari 2024. Despues di 31 di januari 2024 no ta posibel mas pa paga e impuesto di e prome mita di aña 2024 den pida pida.

### Plachinan di number 2024

Pa aña 2024 Departamento di Impuesto lo no otorga plachinan nobo. E contribuyentenan automobilista lo sigui uza e plachinan di number actual, esta esunnan cora cu blanco.

### Cumpli na tempo

No ta necesario pa warda te ora e fecha final di 31 di januari 2024 ta cerca pa cumpli cu e pago di impuesto. Manera conoci, e contribuyente lo haya un boet di 50% pa incumplimento den caso cu no haci pago of haci e pago laat. Sea ta haci pago di impuesto den un solo biaha of den varios biaha, Departamento di Impuesto ta recomenda pa cumpli na tempo y evita asina gastonan innecesario.

### Paga impuesto di vehiculo di motor 2024 adelanta y den pida pida



Categoria

Suma minimo pa luna

A, V, MFA, MFV, TR, V, B (bus chikito), AG, BR, GAR

Afl. 50

B (bus grandi), Plachi di nomber, DT, O, T

Afl. 200



## Workshop IDEA

# 'TIME FOR TAXES'

## Everything Small Business Owners & Entrepreneurs need to know about filing taxes

Departamento di Asuntonan Economico, Comercio y Industria mediante su unit di Iniciativa pa Desaroyo pa Empresa Arubano (IDEA) y cu colaboracion di Departamento di Impuesto (DIMP), kier invita tur persona cu ta den proceso pa habri un negoshi of cu ya tin un negoshi existente, pa asisti na IDEA su workshop di "Time for Taxes".

E workshop aki ta completamente GRATIS y ta tuma luga na: Departamento di Asuntonan Economico, Comercio y industria (DEZHI)

den Sun Plaza Building, piso 2, sala 25;

Dia: Diamars, 19 september 2023

Orario: 9:30 am pa 12:00 pm.

Algun topiconan cu e representantenan di Departamento di Impuesto (DIMP), lo trece dilanti durante e workshop aki ta lo siguiente:

- Impuesto riba Entrada y Ganashi (Inkomsten y Winstbelasting);
- Deber Administrativo (Administratieplicht);
- BBO na frontera;
- Impuesto riba volumen di benta (Toepasselijke belastingen), manera BBO, LB y primanan social;
- Cu kico tur mester tene cuenta ora bo ta bay habri of tin un negoshi.

Pa sigura bo cupo pa e workshop informativo aki, registra na e siguiente link:

<https://www.eventbrite.nl/e/time-for-taxes-everything-smes-entrepr-need-to-know-about-filing-taxes-tickets-717171066967?aff=oddtcreator>

Mirando cu tur aña e interes pa e workshop aki ta hopi grandi y nos cupo ta limita, nos kier a pidi bo cooperacion, pa si acaso bo registra y no por atende e workshop aki mas, sea asina bon pa cancela bo cupo prome cu fecha menciona via nos telefon #: 521-2440 of 521-2439 of email [info@idea.aw](mailto:info@idea.aw).

Esun cu registra prome ta aden! Nos ta warda bo!!



## TIME FOR TAXES

Everything Small Business Owners and entrepreneurs need to know about filing

**FREE workshop**

### TOPICS:

- Income & profit tax
- Administrative duty
- **BBO AT THE BORDER**
- BBO, LB and social premiums
- And all you need to know about the tax system

**Date : Tuesday, September 19, 2023**

**Time : 9:30 am - 12:00 pm**

**Venue : Department of Economic Affairs,  
LG Smith Blvd # 160, Sun Plaza 2nd floor**

**Facilitator: representatives of DIMP**





# RESUMEN DI SIMAN

Asuntonan General,  
Innovacion,  
Organisacion Gubernamental,  
Infraestructura y  
Planificacion Teritorial

PROME MINISTER, EVELYN WEVER-CROES

2 - 8 di september, 2023



## • DESAROYO Y DIVERSIFICACION NA SAN NICOLAS

Gabinete Wever-Croes tin prioridad pa inversion den San Nicolas y ta sostene iniciativanan di San Nicolas Business Association (SNBA) pa atrae inversionistanan pa desaroya y diversifica economia di Aruba, y especialmente di San Nicolas. Prome Minister Evelyn Wever-Croes ta gradici SNBA pa iniciativanan importante aki pa stimula inversion na San Nicolas y pa Aruba.



## • EXPOSICION "E LENS DI MI WOWONAN"

Manera ta conoci, tur aña riba Dia di Prensa, señor Leo Vrolijk ta organisa un exposicion, "E Lens di Mi Wowonan", pa honra miembronan di prensa. Prome Minister Evelyn Wever-Croes ta felicita señor Vrolijk cu e bunita exposicion aki, y ta invita e comunidad di Aruba, pa pasa na Biblioteca Nacional pa asina aprecia e exposicion aki.



## • ACTIVIDAD DIA DI PRENSA

Relaciona cu Dia Mundial di Prensa dia 1 di September, Gobierno di Aruba a organisa un encuentro cu prensa di Aruba como gradicimento pa e trabounan incansabel cu nan ta eherce den nos comunidad. Durante e encuentro, a haci competencianan na unda cu e grupo ganado a ricibi nan premio. Prome Minister den nomber di Gobierno di Aruba ta gradici miembronan di prensa pa acepta e invitacion di Gobierno pa asisti na e actividad aki como tambe pa tur trabou cu nan ta haci.



## • RECONOCIMIENTO SEÑOR HUBERT TIEL

Durante e encuentro cu Prensa diadomingo 3 di September, Gabinete Wever-Croes a reconoce señor Hubert Tiel como un miembro di prensa ehemplar den nos comunidad y como muestra di aprecio y gradicimento pa ta e miembro di prensa di Aruba cu mas a asisti na conferencianan di prensa di Gobierno di Aruba. Prome Minister Evelyn Wever-Croes, den nomber di Gobierno di Aruba ta felicita Señor Hubert Tiel y gradicie pa tur trabou cu e ta haci pa y den nos comunidad.





Asuntunan General,  
Innovacion,  
Organisacion Gubernamental,  
Infraestructura y  
Planificacion Teritorial  
PROME MINISTER, EVELYN WEVER-CROES



• CONGRESO DI FAMILIA;  
"CENDE E CHISPA DI BO RELACION"

Prome Minister a atende e prome congreso special pa pareha yama "Cende e Chispa di bo Relacion". Durante su discurso, el a indica cu un prioridad di Gabinete Wever-Croes ta e bienestar di nos muchanan, y pesey e congreso aki ta asina importante. Prome Minister ta gradici, Comision Vision Pedagogico, pa a organisa un evento exitoso.



• MARIA GORETTI SCHOOL:  
PROYECTO DI EDUTECH

Prome Minister a bishita Maria Goretti School en conexion cu e proyecto di Edutech. Maria Goretti School a gana pa e klasnan 5, borchinan digital, tablets pa e muchanan por haya les riba dje, y laptops pa tur e docentenan di scol. E materialnan aki a wordo instala y finalisa durante vakantie. Prome Minister ta felicita e scol en general, tur docente, alumno, mayornan y specialmente Edutech pa haci esaki posibel.



• VISION DI FINANSA PUBLICO  
SOSTENIBEL Y RESPONSABEL

• HULANDA TA ACEPTA PA SIGUI NEGOCIA  
RIBA PROPOSICION PA UN SOLUCION HIBRIDE

Dialuna ultimo, Prome Minister tabata den Parlamento pa trata e presupuesto supletorio pa aña 2023. E meta di e reunion aki tabata pa envolve Parlamentarionan den fase trempan, pa loke ta e cambionan cu Gobierno kier bin cu ne den e presupuesto. Prome Minister ta gradici tur e profesionalnan di departamento di Finanzas y di Directie Wetgeving, cu a traha incansabel riba e presupuesto. Tambe, ta gradici Minister di Finansa Xiomara Maduro pa su vision y su determinacion, y pa tabatin e presupuesto aki como prioridad, y a logra finalis'e na tempo.

Diahuebs mainta, den Parlamento a tuma luga e reunion publico na unda cu Gobierno di Aruba a duna un update riba negociacionnan cu ta tumando luga cu Hulanda. Prome Minister a indica Gobierno di Aruba a haci un proposicion pa traha cu un solucion hibride, un Rijkswet, Ley di Reino, cu ta regla algun aspecto y un Landsverordening, un ley local, cu ta regla algun aspecto. Gobierno, diaranson 6 di september, a haya un contesta for di Hulanda riba e propuesta aki na unda cu Hulanda a indica di ta dispuesto pa sigui papia riba e tema di solucion hibride.



Uni forsa y cu  
positivismo  
ta produci  
beneficianan grandi  
den diferente area pa  
famianan, politica,  
matrimonio, pais, etc  
Hunto nos ta uza e  
benificianan aki pa  
engrandece nos mes  
y Aruba.



2023

AÑA DI UNION Y POSITIVISMO!